

Da Tusaun en las vischnancas da la Mantogna Dadens

■ La vischnanca da Tusaun sa chat-ta al nord da la Viamala e furma il center economic da la regiun e lieu principal dal district Rain Posterior. La via da la Mantogna Dadens è vegnida construida enturn il 1900 e maina da Tusaun (720 m s.m.) e Masein (865 m s.m.) sur Flerden (1231 m s.m.) ed Urmein (1264 m s.m.) fin a Tschappina (1577 m s.m.). Survart Tschappina collia l'anteriura via da sauma dal Glaspass (Tavellas) la Mantogna cun la Val Stussavgia.

Thusis (Tusaun)

Vischnanca politica e circol, district Rain Posterior (fin il 2000 Mantogna). Center da la regiun dal Rain Posterior, situà a la sortida da la Viamala a la confluenza dal Rain Posterior e da l'Anugl, cun Surnolla dapi il 1875. 1156 *Tosana*, tudestg Thusis (uffizial) 1629 542 abitants; 1850 769; 1900 1281; 1950 1616; 2000 2717.

Chat da munaidas romanas. Il 1156 è menziunada ina curt episcopala centrala en la regiun da Masagn-Tusaun. Ulteriurs possessurs territorials eran la claustra da Cazas, ils Tumbs de Neuburg ed ils baruns de Razén. Enturn il 1200 ha il vizdum episcopal relaschè en in rodel da punt prescripziuns davart la construcziun ed il mantegniment da la punt dal Rain tranter Tusaun e Seglias. Il chastè dad Ober-Tagstein (betg attestà) al sidvest da Tusaun deriva presumadamain dal 13avel tschientaner tardiv. Ils signurs territorials en stads ils de Vaz fin il 1337, alura ils Werdenbergs ed ils baruns de Razén ed, a partir dal 1475, l'uestg da Cuira ch'ha relaschè il 1491 in urden da vischnanca. Ecclesiasticamain apparteneva Tusaun a Munt Son Gion (Reziòlta). En la mesadad dal 15avel tschientaner è attestada la chaplutta consecrada a Nossadunna (Unserer Lieben Frau). Il 1491 è suandà in edifizii nov ed il 1505 han ins installà la pravenda cun las baselgias filialas da S. Albin a Carschenna/Seglias e da S. Flurin a Masagn. La reformaziun ha gi lieu il 1525. La vischnanca da Tusaun era germanisada gia enturn il 1550. Ella è stada ina da las iniziandas da l'amplificaziun da la Viamala (1473). Il port (corporaziun da transport) da Tusaun procurava, ensemen cun Masagn, per il transport da martganzia sin la ruta vers il Spleia ed il San Bernardin. A Tusaun vegnivan organisadas impurtantas fieras annualas ed emnias. Il 1573, il 1618 e 1619 han gi lieu dretgiras nau-chas a Tusaun. Il 1614 è attestads 40 mastergnants, 40 negoziis, 20 pasternarias e 12 ustarias. Il caracter quasi citadin da Tusaun è vegni promovì tras la fundaziun da la chasa da commerzi Rosenroll durant l'emprima mesadad dal 17avel tschientaner ed è vegni rinforzà ultra da quai tras ils fugitivs franzos (ughenots) arrivads enturn il 1700. Il vischinadi da Tusaun ha appartegni fin il 1851, ensemen cun Masagn, Cazas e



Flerden (foto), Urmein e Tschappina furman la Mantogna Sura.

FOTO J. MENOLFI



Il Glaspass (Tavellas) collia la Mantogna cun la Val Stussavgia.

FOTO M. HARTMANN

Tartar, al cumin cun il medem num ed, ensemen cun la Mantogna, Tschupegna e Stussavgia, a la dretgira auta da Tusaun. Il 1709 è la vischnanca sa cumprada libra definitivamain dals dretgs episcopals. L'Anugl periclitetscha regularmain parts da Tusaun; suenter il 1800 han ins urbarisà ulteriur terren en il territori inundà dal Rain e da l'Anugl. La construcziun da la via charrabla en direcziun dal Spleia e dal San Bernardin (1818–23) ha manà a Tusaun in svilup marcant, interrutt il 1882 tras l'avertura da la Viafier dal Gottard. Suenter l'incendi dal 1845 han ins construi la part nova da la vischnanca da Tusaun (Neu-Thusis), agiuntada a la part veglia lung l'Anugl. La via dal Meir en direcziun da l'Alvra e dal Güglia è vegnida construida il 1868–69, quella da la Mantogna Dadens il 1900–01. Il tschancun Cuira-Tusaun da la Viafier retica è vegni realisà il 1896, sia cuntinuaziun en l'Engiadina il 1903. In'emprima ovra electrica datescha dal 1898, l'ospital dal 1912. Ina fabrica da carbid ha existì dal 1898–1914. Dapi il 1950 è Tusaun la sedia administrativa da las Ovras electricas Rain Posterior SA. La via naziunala A13 cun il tunnel dal San Bernardin (1967) ha manà a Tusaun in nov svilup dal traffic e dal commerzi.

Jürg Simonett

Ober-Tagstein

Ruina da chastè sin il spitg dad in grip al sidvest da la vischnanca da Tusaun. L'implant erigi a la fin dal 13avel tschientaner è attestà indirectamain il 1385 ed il 1387 (Unter-Tagstein). In mir massiv da defensiuon protegiva l'edifizii d'abitat davos il chastè. Ils edifizii d'economia sa chattavan probablamain sin la terrassa al sidvest davant il chastè. Suenter la sbalunada d'in mir è il portal vegni spustà a l'ost dal chastè en l'anteriura cisterna. En il 14avel tschientaner tardiv è Ober-Tagstein vegni devastà d'in incendi ed è alura

vegni demoli. A l'ocasiun d'exchavaziuns e restauraziuns dal chastè, exequidas da la Societad grischuna per ils chastels il 1980, e da las perscrutaziuns archeologicas accompagnantas han ins scuvert divers objects pli pitschens dal 13avel e 14avel tschientaner.

Maria-Letizia Boscardin

Masein (Masagn)

Vischnanca politica, circol Tusaun, district Rain Posterior (fin il 2000 Mantogna). La vischnanca cumpiglia ils dus abitadis da Masagn Sura (Ober-Masein) e Masagn Sut (Unter-Masein) al pe da la Mantogna ed ils aclauns da Dalaus, Cresta e Lochmüli. 1156 *de Medezenu*, tudestg Masein (uffizial). 1803 198 abitants; 1850 282; 1900 228; 1950 270; 2000 366. Ils dus abitadis èn sa svilupads probablamain da las duas curtes centralas (menziunadas il 1156) da la claustra da Cazas. Fin la fin dal temp medieval possedeavan bains a Masagn tant ils signurs dals chastels dad Unter-tagstein e Schauenstein sco era singuls purs libers. Signurs territorials èn stads ils de Vaz fin il 1337, alura ils de Werdenberg, ils de Razén ed a partir dal 1475 l'uestg da Cuira. Ecclesiasticamain apparteneva Masagn a Munt Son Gion/Reziòlta, dapi il 1505 sco filiala a Tusaun. La baselgia da S. Flurin è menziunada per l'emprima giada il 1441. La vischnanca è aderida a la refurma il 1525 ed ha gi in agen plevon dal 1731–1873. Il 1473 ha Masagn promovì la meglieraziun da la via tras la Viamala che passava tras il vitg. L'allevament da muvel ed – a moda limitada – la cultivaziun dad ers restan er a l'entschatta dal 21avel tschientaner l'activitad economica principala. Fin il 1851 ha Masagn constitui in vischinadi dal cumin da Tusaun, il 1709 ha la vischnanca cumprà ora ils dretgs episcopals. Construcziun da la via charrabla il 1900–01, avertura d'ina fabrica da cuvertas da launa 1920–67, meglieraziun dal fons 1960–80. Masagn è orientà vers la vischnanca vischina da Tusaun. Ella è stada l'emprima vischnanca grischuna ch'ha concedì als domiciliads betg svizzers il dretg da votar sin plaun communal (2004).

Jürg Simonett

Schauenstein

Ruina da chastè, vischnanca da Masagn, situada sin in crest da la vart sid da la chavorgia da Purtagn. Da l'anteriur implant existan mo anc restanzas ch'ins na po betg datar senza exchavaziuns. Ils signurs *de Schowenstein*, menziunads il 1258, eran sco ministerials da l'uestg da Cuira prefects da la claustra da Cazas (14avel tschientaner) e vizdums (administraturs) en la Tumleasta, nua ch'els possedeavan plirs chastels. Il chastè da Schauenstein è probablamain vegni demoli dals baruns de Razén (per motivs nunconuscents) ed è crudà en emblidanza dapi il 15avel tschientaner.

Adolf Collenberg

Flerden (Flearda)

Vischnanca politica, circol Tusaun, district Rain Posterior (avant il 2001 Mantogna). Vitg accumulà situà a 1234 m sin la Mantogna Dadens. 1156 *Flirden*, tudestg Flerden (uffizial). 1808 148 abitants; 1850 122; 1900 109; 1950 150; 2000 160. La curt centrala da Flearda, menziunada il 1156, apparteneva ensemen cun quella dad Urmagn a la claustra da Cazas. La suveranità territoriala han exercit fin il 1337 ils de Vaz, alura ils de Werdenberg e de Razén, dapi il 1475 l'uestg da Cuira. Il 1709 ha la vischnanca cumprà ora ils davos dretgs feudals episcopals. Fin il 1851 ha Flearda furnì in vischinadi dal cumin da la Mantogna. Il 1426 è attestà in mir da defensiuon (passadi nunconuscent) che serviva probablamain a se-girar il Tavellas. Il 1466 è documentada ina chaplutta deditgada a s. Leonard. Ecclesiasticamain apparteneva Flearda a Munt Son Gion/Reziòlta, dapi il 1505 a S. Gallus a Purtagn. Refurmaziun en ils onns 1530–40. Separaziun ecclesiastica da Purtagn il 1670. La germanisaziun da Flearda, terminada praticamain gia enturn il 1900, è succedida oravert tut a partir da Tschupegna. Avertura da la via d'access a Tusaun 1901. Economicamain predominava l'allevament da muvel a Flearda (fundaziun d'ina societad d'allevament da muvel il 1893). Meglieraziun dal terren 1960–88. Il 2005 lavuravan 70% da las persunas cun activitad da gudogn a Flearda en l'emprim, 5% en il segund sectur; l'onn 2000 eran ca. 30% pendularis dal lieu. Dapi il 2005 consorzi da scola cun la Mantogna Sura.

Jürg Simonett

Urmein (Urmagn)

Vischnanca politica, circol Tusaun, district Rain Posterior (avant il 2001 Mantogna). Vitg a mantun situà a 1264 m sin la Mantogna Dadens. 1156 *Hof de Ormen*, tudestg Urmein (uffizial). 1803 158 abitants; 1850 133; 1900 89; 1950 90; 2000 81. Enturn il 1150 apparteneva Urmagn, sco part da la curt da Flearda, a la claustra da Cazas. Signurs territorials èn stads ils de Vaz fin il 1337, alura ils de Werdenberg e de Razén, a partir dal 1475 l'uestg da Cuira. Urmagn è vegni germanisà davent da Tschupegna. La refurmaziun è succedida tranter il 1530 ed il 1540. Ecclesiasticamain ha Urmagn fatg part da Purtagn. Il 1670 è la vischnanca sa separada, ensemen cun Flearda, da Purtagn. Construcziun da la baselgia 1720–22. Dapi il 1725 furma Urmagn ina pravenda autonoma. Il 1709 ha la vischnanca cumprà ora ils davos dretgs episcopals. Fin il 1851 furniva ella ina vischinanza dal cumin da la Mantogna. L'intschess da l'Anugl sut la vischnanca è periclità permanentamain da bovas. La via per Tusaun è vegnida construida 1900–01. Ils dad Urmagn han pratigà

fin viaden ils onns 1970, sper l'allevament da muvel, era in pau agricultura. Domiciliaziun da bains a la periferia en connex cun la meglieraziun dal fons a partir dal 1960. Urmagn ha mantegnì l'aspect tradiziunal dal vitg grazia a la concentraziun da las chasas da vacanzas ad Urmagn Sura. Dapi il 2005 è la vischnanca commembra dal consorzi da scola da la Mantogna Sura.

Jürg Simonett

Tschappina (Tschupegna)

Vischnanca politica, circol Tusaun, district Rain Posterior. L'abitadi sparpaglià, situà tranter 1384 e 1846 m sin la Mantogna Sura, cumpiglia las fracziuns da Tschupegna Sura e Tschupegna Sut, Ober Gmeind, Usser Glas ed Inner Glas. 1396 *in Schipinen*, tudestg Tschappina (uffizial). 1803 330 abitants; 1850 251; 1900 209; 1950 209; 2000 151. En il 14avel tschientaner èn immigrads – probablamain sin iniziativa dals signurs de Razén – Gualsers da lingua tudestga surtut da la Stussavgia en il territori da Tschupegna, cultivà a moda estensiva dals Rumantschs da la Mantogna. La domiciliaziun da Gualsers ha provocà numerusas dispitas pervi dals cunfins cun las vischnancas situadas pli bass. Il 1512 cumpara la claustra da Cazas sco impurtanta possessura da terren. Ecclesiasticamain ha appartegni Tschupegna a Munt Son Gion (Reziòlta), a partir dal 1505 a Purtagn. Il 1459 è menziunada la chaplutta da S. Joder (Theodor) a Tschupegna. La refurmaziun è vegnida introducida il 1525. En l'emprima mesadad dal 16avel tschientaner è Tschupegna daventà ina plaiv autonoma. Fin il 1851 ha la vischnanca furnì in agen cumin entaifer la dretgira auta da Tusaun e la Lia Grischa. Il 1709 ha Tschupegna cumprà ora ils davos dretgs episcopals. Contacts intensivs han existì cun la Val Stussavgia sur il Tavellas. Causa la ferma erosiun en l'intschess da l'Anugl èblers bains vegnids bandunads. Il 1900–01 è vegnida construida la via a Tusaun. Il 2005 appartenevan anc 76% da las plazzas da lavur al sectur primar (allevament da muvel); dapi il 1958 offeran trais runals in gudogn supplementar als indigens durant ils mais d'enviern. Dapi il 2005 fa Tschupegna part dal consorzi da scola da la Mantogna Sura.

Jürg Simonett



Tusaun cun la Viamala davosvart, fotografia da ca. 1900.

Lexicon Istoric Retic

Il LIR cumpiglia bundant 3100 artgels (geografics, tematics, artgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.